

# Vun driweriwer

---

erscheint auf [www.lenauheim.de](http://www.lenauheim.de)

monatliche  
Erscheinung

August 2019

von Helen Alba

## Im Eemerche gspart

E Weib muss immer trachte, dass es Ehelewe so ruhich un zufriede wie meeglich verlaaft. Dass des nit immer eenfach is, des kann mer sich jo vorstelle. Die Männer sin wie se sin, mer muss nor wisse, wie mer mit ihne umzugehn hat.

De Vetter Joschi is seit Johre Rentner. In dere Blockwohnung tut er sich langweile. Mer kann jo nit de liewe lange Tach Fernseh schau oder Radio horche. Er war zuständig fors Inkaafe, for die Rechnunge zahle. Doch des hat natierlich die Täch nit ausgefillt. Weils jo heescht, mer soll vill spaziere gehn, weil des gut for die Gsundheit is, hat der Mann sich angewehnt, zwaamol am Tach zu gehn, eemol morjets un es zweiti Mol nohmittachs. Dermit war sei Weib, die Bäsl Leni, jo ach inverstann. Nor hat se nit kapiere kenne, wie mer sich de Spaziergang nit so inteele kann, dass mer um een Uhr derhem is, for zu Mittach esse. Wann er zur Tier naus is, de Vetter Joschi, is angsaat gin: „Kumm rechtzeitig hem, sunscht werds Esse Gstampers“! Er hat gsnappt un war a schun aus der Tier draus. Un dernoh is die Warterei angang. Nit jeds Esse hat mer ufwärme kenne un es Weib is in Rawasch kumm, wann er nit pinktlich hem kumm is. Wann se gschennt hat, des war iwerhaupt nit gut, de Vetter Joschi hat die Schuld immer uf was anres gschob. Mol, dass er zu weit gang is un mit der Elektrisch zuruck hat fahre wille, die is awer nit beikumm; e anres Mol, dass er e Schulkumrad getroff hat un beim Verzähle nit uf die Uhr geschaut hat. Sogar dass er sich im Park uf e Bank ghuckt hat un ingschloft is.

Die Bäsl Leni hat sich de Kopp derdriwert verbroch, wie se ihre Joschi derzu bringe kann, beizeite hem zu kumme. Un ufmol hats gfunkt. Weil ihre Mann aarich gheere gspart hat un immer etwas Geld beiseit leije hat wille, hat se an eem Owet gsaat: „Joschi, mir mache des ab morje an so: do is e leeres Eemerche, in dem Joghurt war. Des stell ich do in die Kredenz. Un jedes Mol, wann du pinktlich zum Esse do bischt, tun ich fünf Lei ins Eemerche“! De Joschi hat gegrinst. Un seit sellem Tach, is er meischt schun vor een Uhr zur Tier rin kumm. Phaar Ausnahme hats schun gin, doch do hat die Bäsl Leni e Au zgedrückt.

## Elektronischi Rechnung

Mer muss beim Inkaafe stark owacht gin, sunscht hat mers Nohschau. Vum Mark han ich schun sovill gschrieb, dorte is es Anschmiere an der Tagesordnung.

In der heitichi Zeit is es am eenfachschte, wann mer in so e Supermark inkaafe geht. Do kriet mer alles uf eem Haufe zu kaafe, mer muss nor immer genuch Geld bei sich han. Weil was dorte alles angebot werd, es fallt em noch ens uns anri in, was mer brauche kann – un scheen git alles im Wägelche verfracht. Doch, wann mer dermit an die Kassa kummt, muss mer arich owacht gin, was die netti Kassierererin dort intippe tut. Weil, ich sin schun phaarmol angeschmiert gin.

Doneilich wieder, awer stark. Ich han nit vill inkaaft, mer schaut doch immer uf die Preise, wann mer die War ins Wägelche tut. Un im Kopprechne kann mer jo nit hunnerperzentich genau alles zamm rechne. Doch ich han so an die 50 Lei gedenkt. Wie ich an der Kassa war, saate die Verkeiferin, ich hätt etwas meh wie 100 zu zahle. Ich han mich getraut es Maul uf zu mache un froo: „Bittscheen, ich han doch nor e bissl im Waan, des kann nit stimme“! Doch zur Antwort han ich kriet: „Bäsl, des geht alles elektronisch. Un stimmt sicher. Ihr hat eich verrechnet“!

Ich schieb de Waan zur Seit un fang an de Kassenzettl zu studiere. Uner anrem hat ich ach e Salatopp kaaft. Un dorte steht, uf dem Zettl, der hätt 51 Lei gekoscht. Do han ich awer Aue gemacht! Un je zuruck zur Kasse. „Bittscheen, es stimmt awer nit! Eier Salat is mer zu teier. Hollt ne zruck, ich will ne nimi“! Ich han wieder alles aus em Waan gerafft, des Weib hat de Scheef geruft. Sie han wieder alles „elektronisch“ abgerechnet. Un die Gesamtsumme, die raus kumm is, war 52 Lei. Natierlich han se mer des Geld, was ich zuvill geblecht han, zuruck gin. Awer leider ohne sich zu entschuldiche. Un ich han mer vorghol, immer scheen ufm Kassenzettl zu verfolge, was mer „elektronisch“ angerechnet werd.